



PRAEFATIO.

Anno MDCCCXXXVII Londini Anglorum aliquantum temporis commoratus, atque in libris Sanscritis legendis et excerptis acriter deditus, hoc quoque per totum terrarum orbem iam celebratissimi **KALIDASAE** drama, cuius argumentum a **WILSONE** olim exhibitum valde me delectaverat, describere coepi. In patriam vero redire mox coactus apographum perficere non potui. Postquam autem singulari munificentia atque liberalitate Serenissimi Cancellarii academiarum Scandinavicarum, Principis **JOSEPHI FRANCISCI OSCARIS**, Viri de omni litterarum genere longe meritissimi, subsidia nactus sum, quibus possem, quod diu exoptaveram, persequi, constitui Bonnam, Musarum Indicarum sedem principalem, adire, studiisque ibi peractis, Londinum revisere, ut, quod olim inchoaveram, ad finem perducerem. Bonnam autem posse visitare eam ob causam summopere gavisus sum, quia